



## ABASHIIYA SSI BASIRAAMU

Amatendo gonna amalungi era amajjuvu ga Allah ﷻ, omutonzi, omufuzi era omulabirizi w'ebitonde. Okusaasira n'emirembe bibe ku mubaka Muhammad ﷺ n'abantu b'enju ye, ne ba Swahaaba be ab'ebitiibwa, n'abo bonna ababagoberera mu bulungamu okutuusa ku lunaku lw'enkomerero.

Abasiraamu ba Uganda mwenna ab'ebitiibwa, oluvannyuma lw'okutandika okulaba okweyoleka kw'obushiiya mu ggwanga lyaffe ery'ekitiibwa erya Uganda, era ng'abashiiya beeyita Basiraamu, nga n'amasinzizo gaabwe bagayita mizikiti, era nga n'amasomero gaabwe bagayita ga Busiraamu, ba maseeka bano wammanga: **Miilaad Abdunoor Kaluuma, Qasim Matovu Kayaaya, Nooh Uthman Kibuuka, Abubakar Muhammad Sserunkuuma, Muusa Ssebalu, Twaha Kakande, Ismael Mutumba, Ahmad Muhammad Lujja, Muhammad Quraish Mazinga, Hassaan Nyanzi**, basazeewo okuvaayo n'okutangaaza kuno okutongole ku nzikiriza y'abashiiya n'okwoleka ennamula y'obusiraamu ku muntu yenna akkiririza mu nzikiriza yaabwe ng'abamanyi b'obusiraamu mu nsi yonna bwe balamula ku nsonga eno. Batangaaza bwe bati ku nsonga zino wammanga:

**Ensonga esooka:** Abashiiya abatandise okweyoleka mu ggwanga lyaffe bagwa mu kibinja ky'abashiiya abayitibwa ba Raafidhwa, Ithinaa ashariyya, Ja'fariyya, Imaamiyya. Era bakkiririza mu nzikiriza egenda okunnyonnyolwa wansi.

**Ensonga ey'okubiri:** Kimanyiddwa bulungi mu ddiini yaffe ey'obusiraamu nti enzikiriza entuufu y'efuula omuntu Omusiraamu. Enzikiriza y'omuntu bw'efa, obusiraamu bwawukana naye ne bw'asigala nga ye yeeyita Musiraamu. Ku nsonga eyo ow'ekitiibwa Allah ﷻ yagamba nti:

{ وَمَنْ يَكْفُرْ بِالْآيَاتِنَا فَقَدْ حَبِطَ عَمَلُهُ وَهُوَ فِي الْآخِرَةِ مِنَ الْخَاسِرِينَ } [سورة المائدة]

**N'oyo yenna awakanya n'akaafuwalira Obukkiriza,  
mazima ddala emirimu gye gyonna giba gisaanyewo, era  
ku lunaku lw'enkomerero agenda kuba mw'abo  
abafaafaaganiddwa**

Era n'agamba nti:

{ وَمَنْ يَكْفُرْ بِاللَّهِ وَمَلَائِكَتِهِ وَكُتُبِهِ وَرُسُلِهِ وَالْيَوْمِ الْآخِرِ فَقَدْ ضَلَّ ضَلَالًا بَعِيدًا }  
[سورة النساء]

**N'oyo yenna akaafuwalira Allah ne bamalaika be,  
n'ebitabo bye, n'ababaka be, n'olunaku lw'enkomerero,  
mu mazima ddala aba abuze olubula olw'ewala ennyo.**

## BAWAKANYA EBIKOLO BY'OBUKKIRIZA

**Ensonga ey'okusatu:** Abashiiya bawakanya obukkiriza obuzimbirwako eddiini y'obusiraamu era ne bawakanya ebikolo by'eddiini y'obusiraamu ebikulu ebyegattibwako Abasiraamu bonna era ebimanyiddwa obulungi nti omuntu tasobola kuba Musiraamu okuggyako ng'akkiriza ebikolo ebyo mu nzikiriza entuufu.

**Ekikolo ekisooka:** Bawakanya okumanya kwa Allah ﷻ okujjuvu! Bagamba nti Allah ﷻ akola ekintu oluvannyuma n'akizuula nti kye yakola yali nsobi n'akikyusaamu!! So nga abantu bonna, Abasiraamu n'abatali basiraamu beegatta ku bujjuvu bw'okumanya kwa Allah ﷻ era nti amanyi ebyaliwo, n'ebiriwo, n'ebiribaawo. Enzikiriza yaabwe eno eyoleka entikko y'obukaafiiri, n'obutagulumiza Allah ﷻ, era eyeesisiwaza n'abatali basiraamu eyitibwa Al Badaa. Ow'ekitiibwa Allah ﷻ ng'ayogera ku bujjuvu bw'okumanya kwe yagamba nti:

{ وَاللَّهُ يَكُلُّ شَيْءًا عَلَيْهِمُ ﴿٢٥﴾ } [سورة النور]

**Era Allah alina okumanya okujjuvu ku buli kintu.**

Era n'agamba nti:

{ لَنَعْلَمُوا أَنَّ اللَّهَ عَلَى كُلِّ شَيْءٍ قَدِيرٌ وَأَنَّ اللَّهَ قَدْ أَحَاطَ بِكُلِّ شَيْءٍ عِلْمًا ﴿١٢﴾ } [سورة الطلاق]

**Mukimanye nti mazima ddala Allah alina obusobozi  
obujjuvu n'okugera okujjuvu ku buli kintu, era nti mazima  
ddala okumanya kwa Allah kwetooloola  
ne kubuna buli kintu kyonna.**

Era n'agamba nti:

{ اِسْمَاءُ اِلٰهِكُمْ اَللّٰهُ الَّذِي لَا اِلٰهَ اِلَّا هُوَ وَسِعَ كُلَّ شَيْءٍ عِلْمًا ﴿١٨﴾ } [سورة طه]

**Mazima ddala gwe musinza mu butuufu ye Allah  
oyo atalina kirala kyonna kisinziibwa mu butuufu  
okuggyako yye. Okumanya kwe kwabuna buli kintu.**

## **BA IMAAM 12**

**Ekikolo ekyokubiri:** Bakkiririza mu ba Imaam 12 abataliiko bujulizi bwonna mu Qur'aan wadde mu Hadiith emu bweti. Ba Imaam bano babawa ebitendo ebyeyawulidde Allah ﷻ – ng'okuba mbu bamanyi ebyaliwo n'ebiriwo n'ebiribaawo!! Era nti batuukirivu abatasobola kukola nsobi wadde okuwubwa, wadde okwerabira!! So ng'ate bagamba nti Allah ﷻ akola ensobi era awubwa!!

Ba Imaam baabwe bano, okusenziira ku nzikiriza yaabwe, bali ku ddaala lya bannabbi! Era nti be basigala batwala obwanabbi mu maaso!! Mbu era Allah ﷻ asigala abassaako obubaka nga bw'abussa ku banabbi!! So nga Abasiraamu bonna baakyegattako nti Omubaka Muhammad ﷺ ye nabbi

ow'enkomerero. Era ne bakyegattako nti omuntu yenna eyeeyita n'abbi oba akkiriza nti waliyo nabbi omulala eyajja oluvannyuma lw'omubaka Muhammad ﷺ aba mukaafiiri olw'okulimbisa Allah ﷻ eyagamba nti:

{ مَا كَانَ مُحَمَّدٌ أَبَا أَحَدٍ مِّن رِّجَالِكُمْ وَلَكِن رَّسُولَ اللَّهِ وَخَاتَمَ النَّبِيِّينَ } (٥٢)

[سورة الأحزاب]

**Nabbi Muhammad tabangako taata w'omu kummwe,  
wabula Mubaka wa Allah era ye w'enkomerero  
mu bannabbi.**

N'olwokulimbisa omubaka Muhammad ﷺ eyagamba nti:

كَانَتْ بَنُو إِسْرَائِيلَ تَسُوسُهُمُ الْأَنْبِيَاءُ كُلَّمَا هَلَكَ نَبِيٌّ خَلَفَهُ نَبِيٌّ، وَإِنَّهُ لَا نَبِيَّ بَعْدِي.

(متفق عليه عن أبي هريرة)

**Bannabbi be baali abakulembeze b'abaana ba Isirayiri.  
Nabbi bwe yafanga nga nabbi omulala adda mu bigere  
bye. Wabula mazima ddala tewali nabbi agenda  
kujja luvannyuma lwange.**

Tebakoma awo wokka, wabula bagamba nti ba Imaam baabwe ba nkizo ku bannabbi!! Omu ku bamanyi b'abashiya ku mulembe guno amanyiddwa nga Ayatollah Al Khomainie yagamba mu kitabo kye ekiyitibwa "Al Hukumat Al Islaamiyya" page 52 nti:

وَإِنَّ مِنْ ضَرُورِيَّاتِ مَذْهَبِنَا أَنَّ لَانْتِمَتِنَا مَقَامًا لَا يَبْلُغُهُ مَلَكٌ مُّقَرَّبٌ وَلَا نَبِيٌّ مُّرْسَلٌ

(الحكومة الإسلامية، ص: ٥٢)

**Era mu bikulu ennyo ebiri mu nzikiriza yaffe, mwe muli okukkiriza nti, mazima ddala ba Imaam baffe balina ekifo n'ekitiibwa ekitatuukibwako malayika ey'okumpi ne Allah (nga Jibriil), wadde nabbi eyatumwa Allah!**

## **QUR'AAN MBU KICUPULI!**

**Ekikolo eky'okusatu:** Bawakanya obujjuvu n'obutuukirivu bwa Qur'aan eyeekitiibwa! Bagamba nti Qur'aan eriwo nkendeavu ssi nzijuvu! Mbu ebitundu 70% byaggyibwamu!! Era mbu enzijuvu eri ne Imaam waabwe ow'ekkumi n'ababiri mbu eyabulira mu mpuku mu kibuga samarra mu Iraq emyaka 1276 egiyise - nga wa myaka 5! Mbu erinnya lye ye Muhammad bun Alhasan Al Askarie era gwe bayita Al Mahadie omulindwa! Era mbu enkomerero nga egenda kutuuka ajja kujja ne Qur'aan entuufu era enzijuvu!

So nga Abasiraamu bonna mu bibinja byabwe ebyenjawulo, beegatta ku bujjuvu n'obutuukirivu bwa Qur'aan, era ne bakyegattako nti eriko obukuumi bwa Allah ﷻ oyo eyeeyama okugikuuma. Era ne bakyegattako nti omuntu yenna awakanya obujjuvu n'obutuukirivu bwayo, oba n'abaako ky'agiwabula kyonna, ne bwe kiba kigambo kimu kyokka, oba mpeerezi emu yokka, aba mukaafiiri ow'olulango olw'okuwabula Allah ﷻ omukenkufu atakola nsobi, n'olwokuwakanya Allah ﷻ oyo eyagamba nti:

{ إِنَّا نَحْنُ نَزَّلْنَا الذِّكْرَ وَإِنَّا لَهُ لَحَافِظُونَ ﴿١﴾ } [سورة الحجر]

**Mazima ddala Ffe (Nze) twassa Qur'aan, era mazima ddala Ffe tugikuuma.**

Era n'agamba nti:

{ وَإِنَّهُ لَكَنَبُّ عَزِيزٌ ﴿٤١﴾ لَا يَأْنِيهِ الْبَاطِلُ مِنْ بَيْنِ يَدَيْهِ وَلَا مِنْ خَلْفِهِ تَنْزِيلٌ مِّنْ حَكِيمٍ حَمِيدٍ ﴿٤٢﴾ } [سورة فصلت]

**Era mazima ddala Qur'aan kitabo kya kitiibwa; obukyamu tebusobola kukiyingirira nga bukiva mu maaso, wadde nga bukiva emabega, kyassibwa nga kiva eri Omugezi atende bwa n'amatendo amajjuvu.**

## **OBUBAKA BWALI BWA ALIE!**

**Ekikolo eky'okuna:** Bagamba nti obubaka tebwali bwa nabbi Muhammad ﷺ!! Mbu bwali bwa Alie ﷺ wabula malaika Jubril ﷺ n'ebukumpanya n'ebuwa nabbi Muhammad ﷺ! Era bakolimira Malaika Jibril ﷺ mbu eyakumpanya obubaka. Teri kubuusabuusa nti enzikiriza eno ejjuddemu obukaafiiri mu ngeri zino wammanga:

**Esooka:** Erimu okuwakanya obwanabbi bw'omubaka Muhammad ﷺ. Anti enzikiriza eno eba eraga nti Allah ﷻ tamulondangako era tamutumangako, wabula obubaka yabufuna mu bulyake era yanyakula bunyakule ku Alie ﷺ

nga yeekobaana ne malaika Jibril ءجبرئيل!! So nga Allah ءالله  
yagamba mu Qur'aan nti:

{ مُحَمَّدٌ رَّسُولُ اللَّهِ ۚ (٢٩) } الفتح

**Muhammad mubaka wa Allah.**

N'agamba ءالله nti:

{ وَمَا مُحَمَّدٌ إِلَّا رَسُولٌ قَدْ خَلَتْ مِنْ قَبْلِهِ الرُّسُلُ ۚ (١٤٤) } [سورة آل عمران]

**Muhammad talina kirala kyonna ky'ali okuggyako okuba  
nti Mubaka (wa Allah), Mazima waaliwo ababaka  
abalala abaamukulembwa okutumibwa.**

N'agamba ءالله era nti:

{ وَالَّذِينَ آمَنُوا وَعَمِلُوا الصَّالِحَاتِ وَآمَنُوا بِمَا نُزِّلَ عَلَى مُحَمَّدٍ وَهُوَ الْحَقُّ مِنْ رَبِّهِمْ (٢) }  
[سورة محمد]

**N'abo Abakkiriza ne bakola emirimu emirungi, ne  
bakkiriza ebyo ebyassibwa ku Muhammad era nga ge  
mazima agaava eri Omulezi waabwe.**

Swahaaba ow'ekitiibwa ayitibwa Amru bun Abasa Assulamie  
ءالله bwe yajja okusiramuka yabuuza omubaka Muhammad ءالله  
nti:



مَا أَنْتَ؟ قَالَ أَنَا نَبِيٌّ. فَقُلْتُ وَمَا نَبِيٌّ؟ قَالَ أَرْسَلَنِي اللَّهُ.  
(رواه مسلم عن عمرو بن عبسة السلمي رضي الله عنه)

**Ggwe ani? N'amwanukula nti: Nze nabbi. N'amubuuza nti: Nabbi kyekki? N'amwanukula nti: Allah yantuma.**

**Ey'okubiri:** Erimu okutyoboola Allah ﷻ oyo eyeesiga malaika enkumpanya! Ekiraga nti Allah ﷻ talina kumanya kumala okutegeera nti malaika gy'atuma nkumpanya, era obubaka tebutwalira gwe yagiragira okubuwa! Era olw'okumanya okwo okutono, kye yava agyongera obubaka obulala okumala ebbanga lya myaka 23 nga takizuulanga nti ebutwalira mulala!

**Ey'okusatu:** Enzikiriza eyo erimu okuba nti abashiiya balina okumanya okusinga okwa Allah ﷻ! Era olw'obusukkulumu bw'okumanya kwabwe, baasobola okumanya obukumpanya bwa malaika Jibril so nga Allah ﷻ teyasobola kubumanya!!

**Ey'okuna:** Enzikiriza eyo eraga nti eddiini y'obusiraamu ssi ntuufu. Kubanga eyagireetera nabbi ssi mwesigwa! Bwaba asobola okukumpanya n'atagitwalira gwe bamulagidde, ate tukakasa tutya nti bwo obubaka teyabukumpanya n'abukyusakyusaamu?!

**Ey'okutaano:** Erimu okusukkulumya Alie ﷺ ku mubaka Muhammad ﷺ. Anti awo Alie y'aba nabbi Allah ﷻ gwe yasiima ate nga Omubaka Muhammad ﷺ muntu wa bulijjo!! So nga Abasiraamu tebabuusabuusa nti Alie ﷺ ali bunaayira

nnyo n'obubuze bw'abashiiya abamwesibako mu bulyazaamaanya.

Na bwekityo abamanyi b'obusiraamu beegatta ku kukaafuwaza omuntu yenna alina enzikiriza eyo olw'okuwakanya Allah ﷻ eyagamba nti ye kennyini ye yatuma malaika Jibril eri Omubaka Muhammad n'olwokulimbisa Allah eyatenda malaika Jibril ﷺ n'obwesigwa. Allah ﷻ yagamba nti:

{ نَزَلَ بِهِ الرُّوحُ الْأَمِينُ ﴿١٩٣﴾ عَلَى قَلْبِكَ لِتَكُونَ مِنَ الْمُنذِرِينَ ﴿١٩٤﴾ } [سورة الشعراء]

**Eyakka ne Qur'aan ye Malaika Jibril omwesigwa.  
N'agireeta ku mutima gwo osobole okuba mu batiisa  
(abantu ebikyamu n'obubuze).**

N'agamba ﷻ era nti:

{ قُلْ مَنْ كَانَ عَدُوًّا لِجِبْرِيلَ فَإِنَّهُ نَزَّلَهُ عَلَى قَلْبِكَ بِإِذْنِ اللَّهِ ﴿١٧﴾ } [سورة البقرة]

**Bagambe nti oyo yenna alina obukyayi ku malaika Jibril,  
(akimanye nti) mazima ddala obubaka yabuleeta  
ku mutima gwo nga Allah yakkirizza.**

Allah ﷻ era n'akaafuwaza omuntu yenna atyoboola Malaika Jibril ﷺ. yagamba nti:

{ مَنْ كَانَ عَدُوًّا لِلَّهِ وَمَلَائِكَتِهِ وَرُسُلِهِ وَجِبْرِيلَ وَمِيكَالَ فَإِنَّ اللَّهَ

عَدُوٌّ لِلْكَافِرِينَ ﴿١٨﴾ } [سورة البقرة].

**Oyo yenna alina obukyayi ku Allah, ne ba malaika be,  
n'ababaka be, ne malaika Jibril ne, malaika Miikaa'eel,  
(akimanye nti) mazima ddala Allah tayagala bakaafiiri.**

## **BA SWAHAABA BONNA BAKAAFIIRI!**

**Ekikolo eky'okutaano:** Bakaafuwaza ba swahaaba b'omubaka Muhammad ﷺ bonna okuggyako basatu bokka! Bagamba nti bonna baakaafuwala oluvannyuma lw'okufa kw'omubaka Muhammad ﷺ. Babavuma, babakolimira, babatyoboola mu buli ntyoboola yonna – nga tebatalizza Abubakar ne Umar ne Uthmaan ؓ, wadde okutaliza bakyala b'omubaka Muhammad ﷺ ba maama b'abakkiriza!!

Kino nno kiraga entikko y'obukaafiiri bw'abashiiya abo abateesisiwala kutyoboola maka g'omubaka Muhammad ﷺ, n'okutyoboola bakyalabe, ne bakoddomibe: Abubakar ne Umar be yawasaamu, ne Uthmaan gwe yafumbiza bawalabe babiri!! So ng'ekyewuunyisa ennyo, kwe kuba nti obulyazaamaanya buno bwonna babukolera mu linnya ly'okulwanirira n'okwagala abantu b'enju y'omubaka Muhammad ﷺ!!

Era ne kyoleka omulamwa gw'eddiini yaabwe ogw'okusaanyaawo eddiini y'obusiraamu nga beerimbise mu Busiraamu. Ebigendererwa byabwe mu kukaafuwaza ba swahaaba ؓ bye bino:

**Ekisooka:** Okukutulawo olutindo oluyunga wakati w'abasiraamu ne nabbi waabwe. Anti ba swahaaba ﷺ bwe baggyibwawo, ate nga be bokka abasobola okututusaako Qur'aan eyassibwa ku mubaka Muhammad ﷺ, wamu ne hadiith z'omubaka Muhammad ﷺ, eddiini y'obusiraamu eba evuddewo!

**Eky'okubiri:** Okuggya obwesige mu ddiini y'obusiraamu eyo eyayita mu mikono gya baswahaaba mbu abakaafiiri!! Ba swahaaba ﷺ bwe baba nga bakaafiiri, tebasobola kututusaako bukkiriza ate nga bbo ssi bakkiriza.

**Ey'okusatu:** Okukkakkanya n'okutyoboola omubaka Muhammad ﷺ nti yalemererwa okulunda n'okugunjula ba swahaaba be, Obusiraamu ne butabayingira mu mitima gyabwe era ne bakaafuwala oluvannyuma lwe. Ate bbo abashiiya ababuze mbu ne basobola okusomesa abagoberezi baabwe Obusiraamu ne bubayingira mu mitima gyabwe era ne babunywererako!! Kuno kuba kwesukkulumya ku mubaka wa Allah n'okumujolonga, era buba bukaafiiri obutaliiko mpawa yonna. Anti kimanyiddwa nti: teri musomesa wa ddiini asinga nabbi.

**Eky'okuna:** Okusukkulumya amadiini amalala gonna ku Busiraamu Allah ﷻ bwe yayogerako nti kye Kibiina ekisinga obulungi ekyaggyibwayo eri abantu bonna. Anti bw'obuuzabakrisitaayo nti: ani asinga obulungi mu ddiini yammwe? Bakwanukula nti: abayigirizwa ba nabbi Eisa ﷺ. Era bw'obuuzababayudaaya nti: ani asinga obulungi mu ddiini

yammwe? Bakwanukula nti: abayigirizwa ba nabbi Muusa ﷺ. Ate bw'obuuzabashiiya ababuze nti: Ani asinga obubi mu ddiini yammwe? Bakawangamula nti: Ba Swahaaba ba Nabbi Muhammad ﷺ!!!

Na bwe kityo abamanyi b'obusiraamu baasitukiramu ne bakaafuwaza abashiiya, olw'okukaafuwaza ba swahaaba ﷺ abatabuusibwabusibwa nti be basinga Abasiraamu bonna Obukkiriza, n'okumanya, n'okutya Allah ﷻ, era abo abaalafuubana n'omubaka wa Allah n'emisaayi gyabwe, wamu n'emmaali yaabwe okututuusaako Obusiraamu. Era ne babakaafuwaza olw'okuwakanya Allah ﷻ oyo eyawaana ba Swahaaba mu ayaat nyingi mu Qur'aan n'abatendo ebyawaggulu era n'atugaana okuba n'akakuku kubo, era n'atulagira okubasabira. Allah ﷻ yagamba nti:

وَالَّذِينَ جَاءُوا مِنْ بَعْدِهِمْ يَقُولُونَ رَبَّنَا اغْفِرْ لَنَا وَلِإِخْوَانِنَا الَّذِينَ سَبَقُونَا

بِالْإِيمَانِ وَلَا تَجْعَلْ فِي قُلُوبِنَا غِلًّا لِلَّذِينَ آمَنُوا ﴿١٠﴾ [سورة الحشر]

**N'abo abajja oluvannyuma lwabwe (ba swahaaba) bagamba (nga babasabira nti): Omulezi waffe tusonyiwe, era osonyiwe ne baganda baffe abaatukulembera mu bukkiriza, era toteekanga akakukuuzi konna ku mitima gyaffe eri abo Abakkiriza.**

N'omubaka Muhammad ﷺ yatugaana okuvuma ba swahaaba be, n'atugamba nti:

«لَا تَسُبُّوا أَصْحَابِي، لَا تَسُبُّوا أَصْحَابِي، فَوَالَّذِي نَفْسِي بِيَدِهِ لَوْ أَنَّ أَحَدَكُمْ أَنْفَقَ مِثْلَ  
أُحُدٍ ذَهَبًا، مَا أَذْرَكَ مُدًّا أَحَدِهِمْ، وَلَا نَصِيفَهُ» (متفق عليه عن أبي هريرة)

**Temuvumanga ba swahaaba bange, temuvumanga ba  
swahaaba bange. Kubanga ndayira oyo awaniridde omwoyo  
gwange: singa omu kummwe asaddaaka gold eyenkana  
olusozi Uhud tasobola kwenkana lubatu lumu lwokka  
lwe baasaddaaka wadde ekitundu kyalwo.**

## **ABASHIIYA BASHIRIKU AB'OLULANGO**

**Ekikolo eky'omukaaga:** Abashiiya bakkiririza mu kugatta ku Allah ﷻ. Era obulamu bwabwe bwonna babumala mu kusinza ba Imaam baabwe be beesibako - naddala Alie ne Husein - nga babasaba okubamalira ebyetaago ebimanyiddwa nti tewali asobola kubimala okuggyako Allah ﷻ yekka, era nga ye yekka ateeddwa okusabibwa ebyetaago ebyo.

Bakubiriza abagoberezi baabwe okulamaga ku ntaana za ba Imaam baabwe era bwe batuukayo nga babakolera buli kika ky'okusinza ekyeyawulidde Allah ﷻ. Ebigambo nga: "Yaa Alie" ne "Yaa Husein" obisanga biwandiikiddwa ku mayumba gaabwe ne ku byambalo byabwe ne ku bidduka byabwe nga balaajanira Alie ne Husein okubamalira ebizibu n'okubawa obukuumi!! So nga Allah yakaafuwaza omuntu yenna asinza ekintu kyonna ekitali ye, era n'akisaba ebintu ebimweyawulidde. Yagamba ﷻ nti:

{ وَمَنْ يَدْعُ مَعَ اللَّهِ إِلَهًا آخَرَ لَا بُرْهَانَ لَهُ بِهِ فَإِنَّمَا حِسَابُهُ عِنْدَ رَبِّهِ إِنَّهُ

لَا يُفْلِحُ الْكَافِرُونَ ﴿١٧﴾ [سورة المؤمنون].

**N'oyo yenna asaba Allah nga bw'asaba n'ekintu ekirala  
ky'atalinaako bujulizi bukigwanyisa kusabibwa, mazima  
ddala ajja kwennyonnyolako mu maaso g'omulezi we,  
mazima ddala omukaafiiri tagenda kuwona.**

N'agamba ﷻ nti:

{ إِنَّهُ مَنْ يُشْرِكْ بِاللَّهِ فَقَدْ حَرَّمَ اللَّهُ عَلَيْهِ الْجَنَّةَ وَمَأْوَاهُ النَّارُ وَمَا لِلظَّالِمِينَ

مِنْ أَنْصَارٍ ﴿٧٢﴾ [سورة المائدة]

**Oyo yenna agatta ku Allah ekintu kyonna, mazima ddala  
Allah yaziyiza kuye Ejjana okugiyingira, n'obuddo bwe  
muliro, era abalyazaamaanya tebalifuna mutaasa.**

## BANNANFUUSI AB'EKIKOLO

**Ekikolo eky'omusanvu:** Abashiiya bakkiririza mu bunnanfuusi obw'enzikiriza bo bwe bayita Attuq'ya. Tuq'ya kwe kukweka enzikirizayo n'oyolesa enzikiriza efaanana n'eyoyo gw'owangaala naye wadde togikkiriza osobole obutamanyika ky'oli. Obwonno bwe bunnanfuusi bwennyini obuzikiriza era obwegattibwako Abasiraamu bonna nti bubi okusinga obukaafiiri obw'olwatu era obuteekesa nannyinibwo ku ntobo y'omuliro Jahannama – nga Allah ﷻ bwe yagamba nti:

{إِنَّ النَّفِثِينَ فِي الدَّرَكِ الْأَسْفَلِ مِنَ النَّارِ وَلَنْ يَجِدَ لَهُمْ نَصِيرًا ﴿١٤٥﴾}

[سورة النساء]

**Mazima ddala abannanfuusi bajja kuba ku muko  
ogusembera ddala wansi mu muliro.**

Enzikiriza eno eya Tuqya bagyeyambisa okusobola okusimba amakanda mu Basiraamu n'okusaasaana nga tebategerekekese nti bashiiya. Anti bwe baba n'abasiraamu nga boolesa Obusiraamu. Nga beefuula abaagala ba swahaaba ﷻ era nga baboogerako ebirungi. Ate bwe baba bokka na bokka nga babakaafuwaza, nga babakolimira, nga babavuma, nga babatyoboola mu buli ntyoboola yonna. N'enzikiriza endala zonna eziragiddwa waggulu, n'endala ezitalagiddwa, bwe batyo bwe bazikweka okutuusa nga bamaze okusimba



amakanda ne balyoka bazoolesa – nga Allah ﷻ bwe yaboogerako nti:

{ وَإِذَا لَقُوا الَّذِينَ ءَامَنُوا قَالُوا ءَامَنَّا وَإِذَا خَلَوْا إِلَىٰ شَيَاطِينِهِمْ قَالُوا إِنَّا مَعَكُمْ  
إِنَّمَا نَحْنُ مُسْتَهْزَءُونَ } [سورة البقرة]

**Bwe basisinkana Abakkiriza babagamba nti: Tuli  
Bakkiriza. Kyokka bwe badda eri sitaani zaabwe nga  
bagamba nti: mazima ddala ffe tuli wamu nammwe,  
mazima ddala bali tujeeja bajeeje.**

Allah ﷻ era n'atutegeeza nti mu bitendo byabwe:

{ يَقُولُونَ بِأَفْوَاهِهِمْ مَا لَيْسَ فِي قُلُوبِهِمْ ۚ وَاللَّهُ أَعْلَمُ بِمَا يَكْتُمُونَ } [سورة آل  
عمران]

**Boogeza emimwa gyabwe ebitabali ku mitima. So  
nga Allah amanyi bulungi bye bakukulira  
(mu mitima gyabwe).**

N'olwekyo toguumaazibwa ekintu kyonna omushiiya  
ky'akola nga kiri mu Busiraamu n'obuusabuusa mu bukaafiiri  
bwe, oba n'omatira n'okulayira kwe nga yeegaana enzikiriza  
ye, kubanga obunnanfuusi obwo bwe bayita Tuq'ya kikolo  
kinene nnyo mu ddiini yaabwe era mwe bayita okusaasaana.

## **BASEEGU, BAKABA, BENZI ABOONOONEFU**

**Ensonga ey'omunaana:** Abashiiya bakkiriza mu kusaasaanya obuseegu n'obwonoonefu mu nsi, era bakkiriza mu bwenzi bwe bahalalisa nga beerimbise mu kika ky'empasa ekyaliwo mu jaahiliyya – ng'obusiraamu tebunajja - ne mu ntandikwa y'obusiraamu, oluvannyuma Omubaka wa Allah n'akiwera era Abasiraamu bonna ne bakyegattako nti empasa ey'endagaano ey'ekiseera (contract marriage) eri haraam. Swahaaba ow'ekitiibwa ayitibwa Sabra Al Juhanie ﷺ yagamba nti:

أَنَّ رَسُولَ اللَّهِ ﷺ وَسَلَّمَ نَهَى عَنِ الْمُتْعَةِ وَقَالَ أَلَا إِنَّهَا حَرَامٌ مِنْ يَوْمِكُمْ هَذَا إِلَى يَوْمِ الْقِيَامَةِ (رواه مسلم عن سيرة الجهنبي ﷺ)

**Mazima omubaka wa Allah yaziyiza okuwasa  
okw'endagaano, n'agamba nti: Mukimanye nti mazima  
ddala kufuuse haraam okuva olwaleero okutuusa  
ku lunaku lw'enkomerero.**

Nga bayita mu mpasa eno Abasiraamu bonna gye beegattako nti eri haraam, bakkiriza mu ddiini yaabwe embeera z'obwenzi zonna ne batuuka n'okukkiriza okulya ebisiyaga, n'okwegadanga n'obwana obuto, so nga kimanyiddwa nti n'abatali Basiraamu beenyinyala obuseegu obufaananako bwe butyo.

## BALWANYISA HIJJA

**Ensonga ey'omwenda:** Abashiiya tebakkiririza mu Hijja, era okugenda kwabwe e Makka mu biseera bya Hijja baba bagenze kukola fujjo n'okutaataaganya enteekateeka za Hijja. Ebitabo byabwe bikyoleka bulungi nti omushiiya okugenda okusinza entaana za ba Imaam baabwe mu biseera bya Hijja afuna empeera ezisinga ez'omuntu akoze Hijja emirundi egisukka mu 1000!!

Baludde ebbanga nga beewera okusaanyawo masjid ya Nabbi ﷺ eri e Madiina wamu n'okusaanyawo Kaaba, ennyumba y'owekitiibwa Allah, okutuusa lwe baamaliridde okugisaanyawo bateeke mu nkola ekiruubirirwa kyabwe! Abashiiya ba raafidhwa abahuuth abasinziira mu ggwanga lya Yemen baasindise missile e Makka okusaanyawo Kaaba ya Allah!! Wabula Allah , nannyini buyinza eyasaanyawo eggye ly'enjovu eryalumba Kaaba n'aziyiza missile eno okutuuka ku Kaaba era n'etatusibwako bulabe bwonna.

Kino nno kyoleka bulungi nti abashiiya tebakkiririza mu Hijja, era nga bwe batakkiririza mu bikolo by'obusiraamu ebirala by'otegedde waggulu n'ebirala bingi. Singa babadde bakkiririza mu Hijja, era nga balina essuubi n'obwetaavu mu kukola Hijja emyaka emirala mu maaso, era nga Hijja Ibaada gye beegomba n'abaana baabwe abalijja mu maaso bagisangewo era bagikole, ate tebalifubye kusaanyawo Kaaba ekolerwako Hijja.

## ENSONGA ZINO NKULU NNYO

N'olwensonga ezo waggulu n'endala nyingi ze tutasobola kumalayo mu kifo kino ekifunda, kyeyoleka bulungi nnyo nti abashiiya tebakkiriza mu mpagi z'obukkiriza omukaaga. Omuli okukkiriza Allah ﷻ, ne ba malaika be, n'ebitabo bye, n'ababaka be. Anti olabye enzikiriza yaabwe ku Allah ﷻ, ne ku malaika Jibril ﷺ, ne ku Qur'aan, ne ku mubaka Muhammad ﷺ, ne ba swahaaba be ﷺ. N'olwekyo, ensonga zino wammanga zigwana zitegeerekeke bulungi:

**Esooka:** Abashiiya ssi Basiraamu; olw'enzikiza ezo z'olabye waggulu ezitabusibwabusibwa nti emu kuzo ebamalira obutaba Basiraamu. Omuntu yenna afiira ku nzikiriza yaabwe eyo ayingizibwa omuliro n'atagufulumamu obugenderevu n'obugenderevu.

**Ey'okubiri:** Eky'okweyita Abasiraamu, n'okuba n'amannya g'ekisiraamu, n'okuyita amasinzizo gaabwe emizikiti tekibafuula Basiraamu - ebbanga lye bamala nga bakaafuwalira Allah, n'omubaka we, ne Qur'aan, ne malaika Jibril, ne ba swahaaba, n'ebikolo by'obusiraamu ebirala bye bakaafuwalira.

**Ey'okusatu:** Oluvannyuma lw'okukitegeera nti ssi basiraamu, kigwanidde okumanyibwa nti Omusiraamu takkirizibwa kuwasa mukyala mushiiya wadde omushiiya okuwasa omukyala Omusiraamu. Era singa bawoowebwa, okuwoowa okwo kuba kufu.

**Ey'okuna:** Omusiraamu takkirizibwa kusaalira mushiiya nga afudde, wadde okumunaaza, wadde okumusabira, wadde okumukolako omukolo gwonna ogukolebwa ku bafu Abasiraamu.

**Ey'okutaano:** Abashiiya tebakkirizibwa kuziikibwa mu limbo omuziikibwa Abasiraamu.

**Ey'omukaaga:** Omushiiya takkirizibwa kusikira Musiraamu wadde Omusiraamu okusikira omushiiya.

**Ey'omusanvu:** Omusiraamu takkirizibwa kusomera mu ssomero ly'abashiiya, wadde okulisomesaamu. Era takkirizibwa kusaalira mu masinzizo gaabwe kubanga ssi mizikiti gy'abasiraamu.

**Ey'omunaana:** Tewali ddiini esomesebwa mu ggwanga lya Iran okuggyako eddiini y'obushiiya. N'olwekyo omuzadde yenna Omusiraamu takkirizibwa kutwala mwana we Iran mbu okusoma eddiini kubanga aba agenze kusoma bushiiya bw'otegedde waggulu.

**Ey'omwenda:** Abasiraamu bakubirizibwa okutunuulira omuntu yenna asomedde eddiini mu ggwanga lya Iran n'eriiso eggyogi; anti ekikolo ku muntu oyo kiri nti aba mushiiya okutuusa nga embeera emwawula ku kikolo ekyo emweyoleseeko.

**Ey'ekkumi:** Abasiraamu bakubirizibwa okwewala ebitongole by'abashiiya byonna, n'okwesamba emikolo gyabwe, n'enteekateeka yonna gye bakola – ng'empaka z'okusoma Qur'aan ze bategeka kubanga ekigendererwa mu nteekateeka ezo zonna kusendasenda Basiraamu bayingire mu ddiini yaabwe ey'obubuze.

**Ey'ekkumi n'emu:** Tusaba ebitongole by'abasiraamu byonna, n'ebitebe by'abasiraamu eby'enjawulo, obutabudamya muntu yenna amanyiddwamu bushiia olw'ensonga nti kimuwa ekyanya okwonoona enzikiriza z'abasiraamu.

**Ey'ekkumi n'ebbiri:** Ba Imaam b'emizikiti ne ba Du'aat mu Uganda yonna bakubirizibwa okusomesa Abasiraamu obubuze bw'enzikiriza y'abashiiya n'okubamanyisa nti omuntu yenna afiira ku nzikiriza eyo taliva mu muliro.

**Ey'ekkumi n'essatu:** Ayagala okwongera okugaziwa ku bukaafiiri bw'abashiiya n'obubuze bwabwe, n'obujulizi ku buli nzikiriza yaabwe ekooneddwako mu kiwandiiko kino, soma ekitabo: "Abashiiya Be B'ani?" nekitabo ekirala: "Okwegatta Kw'abamanyi B'obusiraamu Ku Bukaafiiri Bw'abashiiya" ebyawandiikibwa muganda waffe sheikh Muhammad Quraish Mazinga ne bikakasibwa ba maseeka baffe ab'ebitiibwa.

**Ey'ekkumi n'ennya:** Okutangaaza kuno tekuwa bbeetu muntu yenna kulumbagana bashiia wadde okubatuusaako

obulabe mu ngeri yonna. Omulamwa gw'ekiwandiiko kino kutangaaza ku nzikiriza y'abashiiya eyo Abasiraamu abangi gye baludde nga beebuuzaako n'okulaga ennamula y'obusiraamu ku nzikiriza eyo.

### **BA MASHAIKH BE BANO:**

- 1) Sheikh Miilaad Abdunoor Kaluuma
- 2) Sheikh Qaasim Mahmood Matovu Kayaaya
- 3) Sheikh Nooh Uthmaan Kibuuka (Abu Najeeba)
- 4) Sheikh Abubakar Muhammad Sserunkuuma
- 5) Sheikh Muusa Ssebalu
- 6) Sheikh Twaha Kakande Kasujja
- 7) Sheikh Ismael Mutumba Gabutula
- 8) Sheikh Ahmad Muhammad Lujja
- 9) Sheikh Muhammad Quraish Mazinga
- 10) Sheikh Hassaan Nyanzi

اللهم صلّ وسلّم على عبدك ورسولك محمد وعلى آله وصحبه أجمعين

والحمد لله ربّ العالمين